


## LA CUNVIGNE Cetant che al vâl il plurilinguîsim

"Il plurilinguîsim: veicul di culture e di imprenditorialitât" al è il teme dai incuintri che si è fat joibe ai 11 di Avrîl a Palaç Antonin a Udin. Protagoniscj dal apontament students, insegnants e imprenditôrs che si son confrontâts su la impuartance de cognossince des lenghis forestis intal mont dal lavôr. L'incuintri, organizât dal Centri internazionâl pal plurilinguîsim (Cip) dal ateneu e de Associazion nazionâl insegnants lenghis forestis, al



jentre intal proget speciâl "Il plurilinguîsim: veicul di culture e di imprenditorialitât" sostignût de Region Friûl Vignesie Julie. La iniziative e vûl fâ cjapâ sù a docents e students la cussience di cemût che il plurilinguîsim, competence trasversâl, al puedi judâ i students a cuistâ competencis interpersonâls, interculturâls e di imprenditorialitât par partecipâ cun bon profit e costrut ae vite lavorative e sociâl in societâts simpri plui diversificadis.